



## **UDALBILTZA**

### **Euskal Herriko Udal eta Udal Hautetsien Biltzarra**

**Udalbiltza eta berau osatzen duten hautetsien aurka Espainiako Audiencia Nacional delako auzitegi bereziak egindako eraso berriaren aurrean, mozio hau aurkezten dugu Udal Osoko Bilkurak eztabaidatu eta onar dezan.**

1999ean Udalbiltza, Euskal Herriko Udal eta Udal Hautetsien Biltzarra, osatu zenetik, Estatuak behin baino gehiagotan eraso dute, batipat espainiar Estatuak. Udalbiltzak, Euskal Herriko lehenengo instituzio nazionalak, Euskal Herriaren eskubideen aitortzaren alde eta nazio eraikuntzaren alde egindako lana dela eta, espainiar zein frantziar estatuak ezin izan dute onartu Euskal Herriak izan dezakeela berezko garapen instituzionala. Euskalduna jauregian sorrera batzarra ospatu aurretik hainbat mehatxu izan ziren, eta Udalbiltza Euskal Herriaren alde lanean hasi zenean eraso horiek areagotu egin ziren. Espainiar Estatuko abokatuak, Udalbiltzak garatzen zuen edozein lan ildo eta ekimen blokeatzeko saiakerak nahikoak ez eta Audiencia Nacional delako auzitegi berezia izan zen 2003ko apirilean eta maiatzean Udalbiltzaren aurkako operazioa agindu zuena. Hainbat alkate eta hautetsi izan ziren atxilotuak Udalbiltzako kide izateagatik, egoitzak itxiak izan ziren, lan egitasmoak eta garapen funtsa bahituak. Gaur egun Udalbiltzako hiru kidek (Miriam Campos, Xabier Alegria eta Joseba Garmendia) espetxean jarraitzen dute.

Orain hilabete, Garzon epaile ezagunaren eskutik, Audiencia Nacional delakoak beste hamaika pertsona inputatu zituen "Udalbiltza auzian". Hauek irailaren leian eta 2an Madrilera deklaratzera deitu zituen eta deklarazioak hartu ondoren, libre geratu ziren inolako bermerik gabe.

Iragan irailaren 22an, 21 euskal herritarren aurkako auziperatzeko autoa kaleratu zuen Garzon epaile espainiarrak. Udalbiltzaren aurka bidegabe abiaturiko eraso

berri honetan, erakunde armatuko kide izatea eta fondoak bidegabeki erabiltzea leporatu zaie Eider Casanova, Lander Etxebarria, Leire Idoiaga, Miriam Campos, Loren Arkotxa, Maribi Ugarteburu, Juankar Alduntzin, Xabier Irigorri, Larraitz Sanzberro, Joseba Garmendia, Miren Josu Aranburu, Karmele Urbistondo, Xabier Alegria, Imanol Esnaola, Miren Odriozola, Urko Irastortza, Oskar Goñi, Expe Iriarte, Jasone Astibia, Txema Jurado eta Xarlo Etxezarretari.

Baina gezurrak gezur eta erasoak eraso ondo baino hobeto dakigu zein den Udalbiltzak bultzatzen duen lana eta gure udaletako hautetsi eta hautetsi ohi hauek izan duten konpromisoa. Hori da, eta ez beste ezer, Espainiako estatuak zigortu nahi duena, udalen bidez herriekiko konpromisoa eta Euskal Herriaren aldeko lana. Eta ez da kasualitatea eraso berri hau une hauetan gertatzea, Udalbiltza berrabiatu den unean hain zuzen ere, Udalbiltzak bere sorreratik harturiko konpromisoak betetzeko urrats berriak ematen hasia den honetan. Hori baita erasoaren benetako helburua, herri gisa dagokigun eskubideen aitortzaren alde egiten den lana, Euskal Herriaren eraikuntzaren aldeko lana, bizi dugun gatazkan konponbide demokratiko baten aldeko lana geldiaraztea da espainiar Estatuak lortu nahi duena. Eta helburu horretan temati darrai espainiar gobernuak, lehenbizi PPreren eskutik eta ondoren, zoritxarrez, PSOEn eskutik.

Aipatu guztia kontutan izanda, inoiz baino garrantzitsuagoa suertatzen da udaletatik Udalbiltzak egiten duen lana bultzatzea eta gure udaletako kide diren hautetsi hauei gure elkartasun osoa helarazteaz gain beraien konpromisoarekin bat egin eta Euskal Herriaren alde lan egiten jarraitzea.

Hala egin zuten abuztuaren 30ean Euskal Herriko hainbat eragile sozial, politiko eta sindikal esanguratsuek Euskalduna Jauregiaren aurrean, adierazpen hau kaleratu zutenean:

- 1) *"Edozein proiektu eta ideia politikok eskubide eta zilegitasun osoa izan behar duela edozein eszenategi demokratikotan, horrela Euskal Herrian ere.*
- 2) *Ildo beretik, euskal herritarrok zilegi dugu geure tresna politikoak, sozialak zein instituzionalak antolatzeke eskubidea, oinarri demokratikoen arabera, horregatik inolako jazarpenik jasan gabe.*
- 3) *Orain salatzen den kasuan, nabarmena da inputatuen izaera publikoa, hauteskundeetan hautatu baitituzte hiritarrek, eta pertsona publikoak baitira. Zeregin publiko horretan jardun izanaren ondorioz, hain zuzen ere, jasaten dute oraingo eraso hau.*

- 4) Gure arteko desberdintasunen gainera, esparru anitza baita hemen azaltzen dena, gure elkartasuna adierazi nahi diegu lehen zein orain auziperatu dituzten guztiei
- 5) Auzibide judiziala ez da modurik egokiena arazo politikoei konponbidea aurkitzeko. Aldiz, eragile politiko guztiei hitza ematea da irtenbide eraginkorrena. Horretan, gure konpromiso publikoa adierazi nahi dugu oraingo honetan ere”.

Hau guztia kontutan hartuta honako mozioa aurkezten dugu Getxoko Udal Osoko Bilkurak eztabaidatu eta onar dezan:

1.- Udal hau bat dator eragile sozial, politiko eta sindikalek kaleratu zuten adierazpenarekin. Udalbiltzaren aurka espainiar Audiencia Nacional delakoak abiatutako eraso berri hau onartezina dela adierazten du. Udalbiltzak Euskal Herriaren eskubideen aitortzaren alde eta nazio eraikuntzaren alde egiten duen lana ezinbestekotzat jo, eta berea egiten du udal honek.

2.- Udal honek bere elkartasun osoa adierazten die egotziak izan diren hogeitabat pertsoneri, baita Udalbiltzako kide izateagatik aurretik prozesatuak izan direnei eta egun espetxean daudenei ere.

3.- Udal honek argi adierazi nahi du Euskal Herriari herri gisa dagozkion eskubideak aitortu behar zaizkiola, eta bide horretatik herri honek bizi duen gatazkaren konponbide demokratikoa etorriko dela.

4.- Udal honek mozio honen berri emango die herritarrei zein komunikabideei.

Euskal Herrian, 2004ko Urrian.